

Siunnersuummut oqaaseqaatit

Oqaaseqaatit nalinginnaasut

1. Aallaqqaasiut

2023-mut Aningaasanut inatsimmut oqaasertaliussami EU-p sinniisoqarfiani sulisut, taakkulu ilaqutaat EU-llu allaffia akileraarutininik akitsuutinillu akiliisussaanninnissaannik aamma akileraartarnermi akitsuusiisarnermilu inatsisit malillugit pisussaaffinnik allanik akiliisussaanninninnissaannik tunngavissaq ilanngunneqarpoq. Tunngavissaq taanna siunnersuut manna aqutugalugu akileraartarnermi inatsisinut nalinginnaasunut nutartikkamut ilanngunneqarpoq.

Inatsisini atuuttuni allassimasut aamma Naalakkersuisut paasissutissiisussaataitanermik nalunaaruteqartussaataitanermillu il.il. aalajangersaanissamut piginnaatinneqarnerisa arlalitsigut erseqqissarneqarnissaat siunnersuutaavoq. Taamattaq Naalakkersuisut naatsorsueqqissaarnissami il.il. atugassanik nalunaaruteqartussaataitanermik nutaanik peqqusinissamut nutaamik piginnaatinneqarnissaat pisariaqartinneqartoq paasinarsivoq.

Tamatuma saniatigut siunnersuummi, pisassarisanat naatsorsuiffimmi erniaat 100 kr.-uppata ikinneruppataluunniit akileraaruseriffik ernialersuinnginnissamut tunngavissinneqarpoq. Immikkullu pisoqartillugu akileraaruseriffik ernialersuinermik unitsitsinissamut kiisalu suliap suliarineqarnerani annertuumik kukkusoqartillugu pisassarisanut ernialiunneqartunik tamakkiisumik ilaannakumilluunniit isumakkeerinissamut tunngavissaqalissaaq.

Kiisalu inatsit, Aningaasarsianit akileraarutit pillugit Inatsisartut inatsisaanni allannguutit UKA 2023/18-imut siunnersuutikkut saqqummiunneqartut malitsigisaannik aaqiivigineqarlunilu ilaneqarpoq, tassani amigartooruteqarnermi missingiilluni inissiinerup nalinginnaasumik suliareqqinneqarnissaanut killiliussap sivitsorneqarnera ilanngullugu.

2. Siunnersuutip imarisai pingaarnertit

2.1. Kattuffiit nunat akornaneersut akiliisussaanninnissaat

Naalagaaffiit aallartitai, sinniisui il.il. aallartitaaffianni assigiinngitsutigut immikkut pisinnaatitaaffeqartarput, eqqartuussisulersuunneqarsinnaanatik akileraartussaataitanatillu. Tamanna naalagaaffiit aallartitai pillugit naalagaaffiit Wienimi isumaqatigiissutaanni aamma sinniisoqarfiit pillugit naalagaaffiit Wienimi isumaqatigiissutaanni allaqqavoq. Soorlu Kalaallit Nunaata Bruxellesimi aallartitai Bruxellesimi akileraartussaatinneqaratik Kalaallit Nunaannullu akileraartussaallutik.

Issittumut tunngasut, pingaartumillu Kalaallit Nunaata soqutigineqarnerulernerisa kingunerisaanik ilimagineqassaaq kattuffiit suliffeqarfiillu nunat akornaneersut Kalaallit

Nunaanni immikkoortorta qarfeqalersinnaanerat. Tamanna ilaatigut EU-p Kalaallit Nunaanni allaffeqalerniarnerata takutippaa.

Nunat allat aallartitaasa sinniisoqarfiisalu akileraartussaatinneqannginnissaat Nunatsinni akileraartarnermi inatsisini periarfissaavoq, tassa naalagaaffiit Wienimi isumaqatigiissutaanni allaqqasut assigalugit. Maleruagassat atuuttut, kattuffiit allat nunat akornaneersut tassunga assingusumik akileraartussaannnginnissaat pillugu piginnaatitsissummik imaqanngillat. Tassa imaappoq kattuffiit nunat akornaneersut naalagaaffimmut nunamulluunniit sinniisuunngitsut, kattuffiulli nunami allamiittup il.il. ataani immikkoortortaasut allaffiusulluunniit, nunaminnut sinniisutut assigisaatulluunniit maaniittutut akileraartarnikkut akitsuusiisarnikkullu piginnaatitaaffeqanngillat.

Nunat allat kattuffinnik il.il. nunat akornaneersunik akileraartarnermut tunngatillugu, naalagaaffiit Wienimi isumaqatigiissutaat malillugu, minnerpaamik naalagaaffiit aallartitaqarfiisa aallartitaasalu assinganik atugassaqaqtitsisarnerat immikkullu piginnaatitaaffeqartitsisarnerat nalinginnaavoq. Taamatut immikkut piginnaatitaaffiit danskit naalagaaffiata inatsit, lov nr. 567, 30. november 1983, lov om rettigheder og immuniteter for internationale organisationer malillugu akuersissutigisinnaavai.

Akileraartarneq akitsuusiisarnerlu Namminersorlutik Oqartussat suliassarai. Naalakkersuisut inuiaat akornanni isumaqatigiissutini akileraartarnermi taamatut ileqqoqartillugu immikkut piginnaatitaaffiliisinnaanissamut ilanngussinissaq siunnersuutimikkut kissaatigaat.

Tamatumani siunertaavoq kattuffiit nunat akornaneersut Kalaallit Nunaanni immikkoortortaqalersut, sinniisoqarfinni aallartitanut sulisunullu allanut nunartik sinnerlugu aallartitaasunut atugassarititaasunut assingusunik neqeroorfigineqarnerunissaat. Taamaammat siunnersuutaavoq Akileraaruserinermik ingerlatsineq pillugu Inatsisartut inatsisaanni piginnaatitsissummik, akileraartarnermut akitsuusiisarnermullu tamarmut atuuttumik ilanngussisoqarnissaa. Akileraaruserinermik ingerlatsineq pillugu inatsimmi inissinneqarneranut pissutaavoq inatsisip akileraartarnermut akitsuusiisarnermullu tunngasunut tamanut atuuttuunera.

Akileraarutini akitsuutinillu akiliisussaannnginnissap saniatigut siunnersuutip imaraa pisussaaffinnik akileraartarnermi akitsuusiisarnermilu inatsisini allaqqasunik, aningaasanik tunniussinermi akileraarutiniq uninngatitsisussaannermik, akileraaruseriffimmut qinnuteqaatinik nassiussisarnissamik, nammineerluni nalunaarsuinissamik, nalunaaruteqartarnissamik paasissutissanilluunniit tunniussinissamik il.il. pisussaaffiliinnginnissaq.

2.2. Nalunaaruteqartussaanerit pillugit maleruagassat nutarterneri

Inatsimmi kapitali 6-ip, paasissutissanik nalunaarutiginnittarnermut tunngasup oqaasertaasa arlalitsigut allanngortinneqarnissaat erseqqissarneqarnissaallu siunnersuutaavoq.

Nalunaaruteqartussaanerit nutarterneqarnissai siunertaavoq, maleruagassanimmi nutaanik ukiuni arlalinni ilaartorneqarnikuummata. Tamakkununga tunngasut ilutigisaanik siunissami maleruagassanik nutaanik ilaartorneqartariaqartarnissaat naatsorsuutigineqassaaq, tassa Kalaallit Nunaata nunat akornanni akileraartarneq pillugu paasissutissanik paarlaasseqatigiittarnissaq pillugu isumaqatigiissuteqarfiginikuummagit.

Tamanna tunngavigalugu siunnersuutaavoq piginnaatitsissutit pillugit maleruagassat assigiinngitsut maanna atuuttut Naalakkersuisunut nalinginnaasumik piginnaatitsissutit maleruagassamut ataatsimut katersorneqarnissaat, ilutigisaanillu taanna nalunaaruteqartussaataitaasunik tamanik, inatsisip kapitali 6-iani maanna pineqartunik ilaneqassasoq.

Inatsimmi § 33-mut innersuussinerit nutarterlugillu ilaneqarnerisigut erseqqissarneqassasoq Naalakkersuisut akileraaruseriffimmut paasissutissanik tunniussisarneq pillugu maleruagassanik erseqqinnerusunik aalajangersaasinnaasut, matumani ilanngullugu nalunaaruteqartussaataitaasut assigiinngitsut paasissutissiisarnissaannut piumasaqaatinik oqilisaasinnaaneq siunnersuutaavoq.

Qaammatikkaartumik nalunaaruteqartarnissat pillugit maleruagassanik aalajangersaanissamut piginnaatitsissut oqaasertamik allannguinnikkut ilaneqarpoq.

Maleruagassap nalinginnaasup Naalakkersuisut nalunaaruteqartussaataitaanerit inatsisip kapitali 6-iani aalajangersagaareersut pillugit pisussaaffinnik nutaanik annertunerusunilluunniit aalajangersaasinnaanannerannik periarfissiinngilaq.

Nalunaaruteqartussaataitaaneq maanna atuuttut qanoq iliorluni akileraaruseriffimmut tunniunneqartarnissaat pillugu maleruagassanik erseqqinnerusunik aalajangersaanissamut piginnaatitsissut atuuttoq periarfisseereerpoq. Tamatumani nalunaaruteqartussaataitaasut, tassa sulisitsisut, pisortat oqartussaasut il.il., qarasaasiakkut nalunaaruteqartarnissaat pillugu maleruagassat pineqarputtaaq. Piginnaatitsissutip nalunaaruteqartussaataitaasunut tamanut atuunnera ilassuteqarnikkut erseqqissarneqarpoq.

Kapitali 6-imi allannguutitigut pisariillisaanissaq siunertaavoq, tassa kapitalimi aalajangersakkat siunissamut piareernerisa saniatigut aammattaaq atuaruminarnerulerlutillu paasiuminarnerulernissaat, Kalaallimmi Nunaata akileraartarnermut tunngasut pillugit paasissutissanik nunat akornaniittunut, aamma Danmarkimut paarlaasseqateqartarnerata kingunerisaanik inatsisit siunissami allanngortarnissaat naatsorsuutigineqarmat.

Kapitali 6-ip allanngartinnera malitseqartillugu tamatumunnga tunngasut pillugit nalunaarut nutarterneqartussaavoq; taanna tassaavoq Aningaasarsianit akileraarutit pillugit paasissutissanik nalunaaruteqartarneq pillugu Namminersorlutik Oqartussat nalunaarutaat nr. 8, 18. juni 2010-meersoq.

Paasissutissiisussaatitaanerup atuuttup allannguallatsinnissaa aamma siunnersuutaavoq, tassa sulisartup Kalaallit Nunaannut akileraartussaana kipippat sulisitsisup, ukiup ingerlanerani aningaasarsiaasut akileraarutillu A-t uninngatinneqartut pillugit paasissutissanik nassiussinissaa akileraaruseriffimmit qinnutigineqarsinnaalersillugu. Maleruagassaq maanna atuuttoq sulisitsisup ukiumoortumik januarip qaammataata naannginnerani nalunaaruteqartussaataitaneranut tapertaavoq. § 31 malillugu paasissutissiisussaatitaanerup soraarnerussutisiaqarnissamut inuunermullu sillimmasiinermut aaqqissuussinernut akiliutit kiisalu taakku A-mut akileraarutai uninngatinneqartut pillugit paasissutissanik ilaneqarnissaa siunnersuutaavoq.

Akileraaruseriffiup il.il. inatsisit atuuttut malillugit taamatut qinnuiginnittarnissaasa ikittuinnaasarnissaat ilimagineqarpoq. Taamaammat paasissutissanik pineqartunik ilanngussinerup paasissutissiisussaatitaasunut akileraaruseriffimmulluunniit allaffissornikkut malunnaatilimmik suliakkersuutaanissaa ilimagineqanngilaq.

2.3. Akileraarutit agguanneqartarnerat pillugu maleruagassat ilaneqarnerat naleqqussarneqarnerallu

Ingerlatseqatigiiffiit Erngup nukingata nukissiornermut atorneqartarnera pillugu Inatsisartut inatsisaat naapertorlugu akuersisummik pigisaqartut aningaasarsianit akileraarutaasa iluanaarutisianillu akileraarutaasa Nunatta karsianit pisassarineqarnerat erseqqissarneqassasooq siunnersuutaavoq. Tamatuma ingerlatseqatigiiffinnut aatsitassat pillugit inatsit naapertorlugu akuersisummik peqartunut atuuttup assigaa.

Tulliatut siunnersuutaavoq ernianit akileraarutit, Aningaasarsianit akileraarutit pillugit Inatsisartut inatsisaata allanngartinneqarnissaanik siunnersuummi siunnersuutigineqartutut Nunatta karsianit, kommunimit akileraarfiusumit kommuninillu agguarneqarnissaat.

2.4. Iluanaarutisianit akileraarutinit il.il. utertitsinissamut piffissaliussat pillugit maleruagassat

Ingerlatseqatigiiffiit inuillu nunami Kalaallit Nunaata marloriaammik akileraarnissaaq pillugu isumaqatigiissuteqarfigisaani angerlarsimaffeqartut iluanaarutisiaminnit akileraarutinit, ingerlatseqatigiiffimmit Kalaallit Nunaanni angerlarsimaffeqartumit iluanaarutisiat tunniunneqarneranni uninngatinneqartunik utertitsiffigineqarnissamut periarfissaqarsinnaapput. Aningaasarsianit akileraarutit pillugit Inatsisartut inatsisaanni allannguutit kingunerisinnaavaat iluanaarutisianit akileraarutinit utertitsisarnerit amerleriarnissaat, tassa qinnuteqaatit utertitallu aningaasartaasa amerlinerisigut.

Taamaattumik siunnersuutaavoq akileraaruseriffiup iluanaarutisianit akileraarutinin kiisalu royaltynik erniallu akileraarutaannik utertitsivigineqarnissamik qinnuteqaatinik suliaqar-tarnerata sivilisunerusumik piffissalerneqarnissaa atuutilersinneqassasoq.

Maleruagassat atuuttut malillugit akileraaruseriffiup qaammammi qinnuteqaammik tigusaqarnerminit, tak. inatsimmi § 44, kingusinnerpaamik qaammatit tulliaa naanerani utertitassanik tunniussinissaa pissaaq. Piffissaliussaq qaangerneqarpat qaammatit aallartinneri tamaasa 1 procentimik ernialersuisoqassaaq. Akileraaruseriffiup qinnuteqaammut tunngavisoq misissorsinnaanngippagu, tamannalu utertitsivigineqarnissamik qinnuteqartumut tunngasunik pissuteqarpat piffissaliussaq kipitinneqassaaq.

Maleruagassat maanna atuuttut akileraaruseriffiup utertitsivigineqarnissamik qinnuteqaatinik suliaqarnissaanut sivikitsuinnarmik piffissaliipput. Akileraaruseriffiup suliaqarnissamut, matumani aamma piginnittuuneq il.il. pillugit paasissutissanik pissarsiniarnermut naammattumik piffissaqarnissaa qulakkeerniarlugu siunnersuutaavoq, akileraaruseriffik iluanaarutisianit akileraarutinin, royaltymut akileraarutinin erniallu akileraarutaannik utertitsinissamik qinnuteqaatinik suliaqarnissamut sivikinnerpaamik qaammatit arfinilinnik piffissaqassasoq.

Siunnersuutaavortaaq akileraaruseriffik tunniussinissamini qularnaveeqqusiisummik piunasaqarnissamut piginnaatinneqassasoq. Tamannali taamaallaat atuutissaaq iluanaarutisianit akileraarutinin utertitsivigineqarnissamik piunasaqarneq isumaqatigiinngissutigineqarpat, suliarlu Akileraarusiinnermi Aalajangiisartunit eqqartuussivinnilluunniit suliarineqarpat.

2.5. Ernialersuinnermut tunngavissamik annertusisitsineq

Siunnersuutaavoq akileraaruseriffik ernialersuinnermik unitsitsinissamut aammalu akileraarutit akiitsuutaannut ernialiunneqareertunik maannakkornit pisartunit amerlanerusuni utertitsinissamut piginnaatinneqassasoq. Allanguut akileraartartunut amerlanngitsunut, akileraarutinit akiitsuminnut kukkusumik ernialersuiffigineqartunut pingaaruteqartussatut nalilerneqarpoq. Kiisalu ernialiussat aningaasartakitsut ikilinissaat akileraaruseriffiup allaffissorneranik oqinnerulersitsissaaq.

2.6. Amigartooruteqarnikkut nalinginnaasumik suliarinneqqittarnermut killiliussap sivitsorneqarnera

Akileraarusiinnikkut amigartoorutit atornissaannut piffissaliussap sivitsorneqarnerata ataqatigiinnera qularnaarniarlugu, nalinginnaasumik akileraarutinin annertussusiliinerup suliareqqinneqarnissaanut nalinginnaasumik killiliussap aamma ukiunik marlunnik kinguartinneqarnissaa siunnersuutaavoq, taamaallaalli amigartooruteqartup, amigartoorutip ukiut tallimat sinnerlugit kinguartinnaasumik nalunaarutiginnissimanerani. Siunnersuut

ilaatigut naatsorsuutunik atortussiat toqqorsimanissaannut malittarisassat tunuliaqutaralugit naatsorsuusiortussaataitaasut atortussianik ukiuni tallimani toqqorsimannittussaataitanerat tunuliaqutaralugu qissiminneqassaaq. Siunnersuutikkut suliffeqarfiit naatsorsuusiormi atortussianik naapertuuttunik tamanik ukiut tallimat sinnerlugit toqqortaateqarnissaannik peqquneqarput. Tassa ukiut tallimat qaangerlugit akileraarusiinikkut amigartoorutunik atorneqanngitsunik kinguartitsinissamik kissaateqassagunik.

Tamanna pillugu aalajangersagaq aningaasarsianit akileraarusiisarneq pillugu Inatsisartut inatsisaata allanngortinneqarneranut siunnersuummi tusarniaassutigineqartumi ilaatinneqaaqaaralarpoq. Tusarniaanerp kingorna allannguut § 47 a-tut siunnersuummut uunga ilanngunneqarpoq, aalajangersagarmi akileraaruserinermik ingerlatsineq pillugu Inatsisartut inatsisaanniippoq, tassanilu nalinginnaasumik akileraarutissamik inissiinermut killiliussat malittarisassiorneqarput.

3. Pisortanut aningaasaqarnikkut allaffissornikkullu kingunerisassat

Kattuffiit nunat akornaneersut akileraartarnikkut akitsuusiisarnikkullu pisussaaffeqannginnissaannik akuersisarnissamut tunngavissamik ilanngussinissaq pillugu siunnersuut aningaasatigut annertuumik kingunerisassaqaangilaq. Kattuffiit nunat akornaneersut Kalaallit Nunaanni immikkoortortaqaqfeqalerniarunik allaffimmik, kattuffiup sinniisutullu aallartitamik il.il. nunani allani pineqarnerattuulli Kalaallit Nunaanni atugassaqaartinneqarnissaat pisariaqartissagaat naatsorsuutaasinnaavoq. Akileraar-tussaatisinnginnissat taakku nunami maani immikkoortortaqalernermi aatsaat akuerineqartussaammata tamanna isertitassatigut annaasaqaataassanganneqanngilaq. Aningaasaqarnikkut kingunerisassat aamma eqqoriarneqarsinnaanngillat, siunissamimi inuiaat akornanni isumaqatigiissutaasussat qanoq imaqassaneri apeqqutaalluinnartussaapput.

Aningaasarsianit akileraarutit pillugit Inatsisartut inatsisaanni allannguutissat kingunerisinnaavaat iluanaarutisianit akileraarutitik utertitsivigineqarnissamik qinnuteqaatit amerlinissaat, taamaalillutillu utertinneqartartut tamarmiusut amerlillutik. Iluanaarutisianit akileraarutitik il.il. utertitsivigineqarnissamik qinnuteqaatit ilaasa suliarineqarnissaannut piffissap sivilunerunissaannik siunnersuutip siunertaa pingarneq tassaavoq, akileraaruseriffiup qinnuteqaatinik tamakkuninnga suliaqarnissaminut naammattumik piffissaqarnissaannik qulakkeerinninissaq. Suliassat suliarineqarnissaannut piffissap siviluneruneratigut utertitassat kingusinaartumik tunniunneqarnerisa kingunerisaannik erniatut akilernerqartartut amerlinerunissaat pinngitsoortinneqassasoq naatsorsuutaavoq. Ilutigitillugu qinnuteqaatinik suliaqarneq misissuinerlu piffissaqarfigineqarnerulerpat isertitassat annaaneqarsinnaanerit millissaaq, utertitassammi tiguisunut tunineqartussaangikkaluartunut kukkusoaqarneratigut tunniunneqarpata tamanna pisinnaassagaluarmat. Piffissaliussap siviluneruneratigut aningaasaqarnikkut kingunerisassanik siumut naatsorsuisoqarsinnaanngilaq.

Naalakkersuisut maleruagassat atuuttut naapertorlugit piginnaatinneqarnerisa erseqqissarneqarnerat isertitassanut sunniuteqassanganneqanngilaq. Akerlianilli paasissutissanik amerlanerusunik, naatsorsueqqissaarnissami il.il. atugassanik ingerlateqqinneqartussanik akileraaruseriffimmut nalunaaruteqartarnissaq pillugu maleruagassanik Naalakkersuisut aalajangersaanissaannut piginnaatitsissummik annertusisitsinissamik siunnersuut piffissaq ungasinnerusoq eqqarsaatigalugu allaffissornermut 0,5 mio. kr.-nik atortutigullu ineriartortitsinermut ataasiartumik 0,5 mio. kr.-t missinginik aningaasartuuteqarnerulernermik kinguneqassaaq. Aningaasartuutissat apeqqutaatillugit ukiumoortumik aningaasanut inatsisinut atatillugu pingaarnersiuiinernut ilaatinneqarsinnaapput.

Akileraaruseriffiup erniat aningaasartaat 100 kr.-ugaangata ikinnerugaangataluunniit ernialersuinnginnissamut tunngavissinneqarnissaa pillugu maleruagassiatut siunnersuut pisortat isertitassatigut ukiumut 7 mio. kr.-t missinginik annaasaqaatigisassagaat naatsorsuutaavoq. Paasissutissat maanna pigineqartut tunngavigalugit nalilerneqarsinnaanngilaq aningaasat taakku ilaat qanoq amerlatigisut susoqaraluarpalluunniit isertinneqarsinnaanngitsutut nalikillilerneqarsinnaassanersut.

Aalajangersakkap akileraaruseriffimmut piginnaatitsinerusup nassatarisaanik allaffissornikkut oqilisaasoqarnissaa aningaasaqarnermilu qarasaasiatigut atortut pigineqareersut oqilisaaffigineqarnissaat pisinnaapput, tassa ernianik akiligassiisarnepup akiliisitsiniartarnerullu annikillinerisigut. Allaffissornikkut suliaassanik annikillisaaneq ukioq naallugu suliap sisamararterutaa ataallugu naleqassanganneqarpoq.

Erngup nukinganik isumaluutinik nukissiamik tunisassiornermut akuersissutilinnit isertitanit akileraarutit Nunatta Karsianut nakkartarnissaannut siunnersuut, siunissaq qaninnerusoq isigalugu aningaasatigut kinguneqaateqassanngilaq, maannakkummi akuersissutinik taamaattunik tunniussaartoqanngilaq. Akuersissutinik tunniussisoqassappat tamanna kommunini erngup nukinganik atuiffinni pisortallu karsiini allani aningaasanik agguaaqqinnermik malitseqassaaq.

Immikkut ittumik pisoqartillugu ernialersuinerup unitsinneqarnissaanik kiisalu pisassarisanut ernialuunneqartut, suliap suliarineqarnerani annertuumik kukkusoqartillugu tamakkiisumik ilaannakumilluunniit isumakkeerneqarnissaannik tunngavissaq pillugu maleruagassatut siunnersuutigineqartup isertitassatigut ukiumut 1 mio. kr.-t inorlugit annaasaqaataanissaa naatsorsuutaavoq.

4. Inuussutissarsiutinik ingerlatsisunut aningaasaqarnikkut allaffissornikkullu kingunerisassat

Siunnersuutip inuussutissarsiutinik ingerlataqartunut isertitassatigut allaffissornikkulluunniit taasarialimmik sunniuteqarnissaa naatsorsuutaanngilaq. Pingaartumik oqaatigineqassaaq nalunaaruteqartussaataanerit atuutereersut allanngortinneqanngimmata.

5. Pinngortitamut, avatangiisinut inuillu peqqissusaannut kingunerisassat

Siunnersuut avatangiisinut pinngortitamulluunniit taasarialinnik kinguneqartussaannngilaq. Siunnersuut aamma inuit peqqissusiannut kinguneqartussaannngilaq.

6. Innuttaasunut kingunerisassat

Siunnersuutip innuttaasut, pisuni aalajangersimasuni akileraarutitut akiitsuminnut ernialersuinerimik unitsitsinissamut periarfissippai.

7. Kingunerisassat pingaarutillit allat

Siunnersuut inuiaat akornanni isumaqatigiissutini akileraartussaannngitsitsinissamik periarfissiivoq.

Siunnersuut naalagaaffeqatigiinnermut tunngasunik imaqanngilaq.

8. Oqartussaasunik aamma kattuffinnik il.il. tusarniaaneq

Siunnersuut 12. maj 2023-mit 9. juni 2023-mut makkununga tusarniaassutigineqarpoq: Sulisitsisut (GE), NUSUKA, Sulinerimik Inuussutissarsiuteqartut Kattuffiat (SIK), BDO, Deloitte, BK Revision, EY Grønland, Grønlands Revisionskontor, Nunatsinni Advokatit, Grønlandsbanken, BankNordik, SISA, Naalakkersuisut Siulittaasuata Naalakkersuisoqarfia, Nunanut Allanut, Inuussutissarsiornermut Niuernermullu Naalakkersuisoqarfik, Ineqarnermut Attaveqaasersuutinullu Naalakkersuisoqarfik, Nunalerinnermut, Imminut Pilersornermut, Nukissiutinut Avatangiisinullu Naalakkersuisoqarfik, Aatsitassanut Inatsisillu Atuutsinneqarnerannut Naalakkersuisoqarfik, Isumaginninnermut, Suliffeqarnermut Nunamullu Namminermut Naalakkersuisoqarfik, Aalisarnermut Piniarnermullu Naalakkersuisoqarfik, Meeqqanut, Inuusuttunut Ilaqutariinnullu Naalakkersuisoqarfik, Peqqinnissamut Naalakkersuisoqarfik, Ilinniartitaanermut, Kultureqarnermut, Timersornermut Ilageeqarnermullu Naalakkersuisoqarfik, Avannaata Kommunia, Kommune Qeqertalik, Qeqqata Kommunia, Kommuneqarfik Sermersooq aamma Kommune Kujalleq.

Siunnersuut Naalakkersuisut tusarniaaviatigut www.naalakkersuisut.gl -ikkut tamanut saq-qummiunneqarpoq.

Tusarniaanermi akissutit pisariaqarneri tunngavigalugit siunnersuutip suliarinerani ilanngunneqarput.

Tusarniaaneq pillugu allakkiaq ilanngussaq 2-miittoq innersuussutigineqarpoq.

Siunnersuummi aalajangersakkanut ataasiakkaanut oqaaseqaatit*§ 1-imut*

Nr. 1-imut

Immikkoortoq 1 a nutaaq, kapitali 3 a nutaaq § 10 a-lu nutaaq nunat tamat akornanni kattuffiit, taakku sulisui taakkulu ilaqutaat akileraarutitut akitsuutinullu akiliisussaatitaannginnissaat siunertaralugu siunnersuutigineqarpoq.

Kattuffiit suliffeqarfiillu nunat akornaneersut taakkualu sinniisuutitaasa kiisalu taakku ilaqutaasa akileraartarnermi akitsuusiisarnermilu maleruagassat atuuttut atuutilertussallu naapertorlugit akileraarutit, akitsuutit pisussaaftinnillu akiliisussaatinneqannginnissaat pillugu Naalakkersuisut isumaqatigiissutitigut akuersisarnissaannik sukumiisumik piginnaatitsinissaq siunnersuutaavoq.

Aalajangersakkap imartussusianut pissutaavoq aalajangersakkap pingaarnertut siunertarimma-gu, Naalakkersuisut akileraartussaatisinnginnissamik il.il., annertuutitigut naalagaaffiit Wienimi isumaqatigiissutaani allassimasut assingit akuersinissamut piginnaatinneqarnissaat. Taamaattumik inatsimmi aalajangersagaq piaaraluni imartuumik oqaasertaqartinneqarpoq. Imartussusia suullu akilernerqartussaatinneqassannginnerat inuiaat akornanni isumaqatigiissutini erseqqissumik aalajangersarneqartassapput, soorluttaaq taakku allaffissornermi suliarineqartarnissaannut periusissaq erseqqinnerusumik aalajangersarneqarsinnaasoq.

Akileraartussaatisinnginneq siullertut tassaasinnaavoq kattuffimmut atuuttoq, tassa Kalaallit Nunaanni allaffiit illuutillu kattuffiup sulinissaani pisariaqartinneqartut ilanngullugit. Tamana isumaqarpoq kattuffik assersuutigalugu nioqqutissanik qamutinillu motoorilinnik eqqussuinnerminut aamma pigisamik aalaakkaasumik pisinnerminut atatillugu eqqussuinnermi akitsuutit naqissusiinnermilu akitsuutit akiliisussaatinneqassanngitsoq. Akiliisussaatitsinnginneq aamma tassaasinnaavoq aningaasarsianik A-nik il.il. tunniussinnermut atatillugu akileraarutit A-nik unerartitsisussaatitaannginneq nassuiaateqartussaataanninnerlu.

Aalajangersakkap imm. 2-ani aalajangersagaavoq akiliisussaatitsinnginnerit inunnut nr. 1-imit 3-mut taagorneqartunut atuussinnaasut.

Aalajangersakkap nr. 1-iani taaguut aallartitatut atorfeqartut assersuutigalugu tassaasinnaapput allaffimmi aalajangersimasumik atorfeqartit, sulisut teknikkimik suliallit kiisalu kiffatut sulisut. Aallartitat ilaqutaat aamma aalajangersakkami pineqartunut ilaasinnaapput. Aallartitat aappaasa qitornaasalu aallartitaq ilagalugu aallartut taamatuttaaq akileraarutit akiliisussaatinneqannginnissaat nunat akornani akuersaagaalluni

atorneqarluartuuvoq. Aappaasorli tikeqataasoq assersuutigalugu Kalaallit Nunaanni suliffeqaleruni, inuussutissarsiornikkulluunniit tassani annikinngitsunik isertitaqaruni isertitat taakku Kalaallit Nunaanni akileraaruteqaatigisussaavai.

Aalajangersagarli pisut apeqqutaatillugit aamma sulisut atorfiniffiusumi Kalaallit Nunaanni najugaqartut tassaniittulluunniit akileraartussaatinneqannginnissaannut tunngavigineqassaaq. Sulisut taakku akileraartarnikkut kattuffimmit pineqartumit aallartitat allat assigalugit akileraartarnikkut inissisimaffeqassapput. Taamatut iliuuseqarneq nunatsinni innuttaasut sulisinnaanermik periarfissaannik pitsannguissaaq, taamaalillunilu nunat tamat akornanni sulinermi ilisimasaat paasisaallu annertunerulissallutik.

Aalajangersakkap nr. 2-ani taaguut paasisimasallit tassaavoq immikkut ilisimasallit teknikkikkullu siunnersortit kattuffiup aalajangersimasumik sulisorisaanut ilaanngitsut. Assersuutigalugu tassaasinnaapput immikkut ilisimasallit kattuffiup suliniutini immikkut ittuni suliaqartussatut atorfinitsitai.

Aalajangersakkami nr. 3 malillugu inuit saqitsaassutit suliarineqarneranni kattuffik sinnerlugu peqataasut aamma akileraartussaatinneqanngissinnaapput.

Nr. 1-imisulli nr. 2-3-lu sulisunut, suliffeqarfinnut il.il., piffissami kattuffimmik isumaqatigiissuteqarfigisaminni Kalaallit Nunaanni angerlarsimaffeqartut, najugaqartut tassaniittulluunniit akileraartussaatinneqannginnissaannut tunngavigineqarsinnaanngillat.

Aalajangersakkap imm. 3-ani Naalakkersuisut isumaqatigiissutit taaneqartut naammassineqarnissaat pillugit iliuusissanik erseqqinnerusunik aalajangersaanissamut piginnaatinneqarput. Tamanna pisinnaavoq nalunaarutini maleruagassanik erseqqinnerusunik aalajangersaanikkut, ilitsersuutini atuutilersitsinikkut, imaluunniit nioqqutissanik aamma qamutiniq motoorilinnik il.il. eqqussuinermi akitsuuserneqartussaannngitsunik suliaqarnermi periusissanik aalajangersaanikkut.

Nr. 2-mut

Inatsimmi § 30 a, imm. 2-mi kukkunermik aaqqiinerinnaavoq.

§ 30 a-mi aalajangersagaq 2016-imi ilanngunneqarpoq. Aalajangersakkap imm 2-ani inatsit § 30, imm. 1, nr. 5 aamma 6 pineqarput. Innersuussineq taanna § 30, imm. 1, nr. 4-mut aamma 5-imut iluarsineqarpoq. Tassani akileraartartup kinaaneranut tunngatillugu paasisutissanut innersuussineq pineqarpoq.

Nr. 3-mut

§ 31, imm. 1-imi inatsimmi § 30 a-mut innersuussineq ilanngunneqarpoq.

Inatsimmi § 31 malillugu paasissutissiisussaataaneq aatsaat atorineqassaaq tiguisoq (sulisoq) Kalaallit Nunaannut akileraartussaajunnaarsimappat aammalu aatsaat akileraaruseriffik qinnu-iginnissimappat.

Paasissutissiisussaataanerup ilaneqarnissaa siunnersuutaavoq, taamaalillutik soraarnerussutisiaqarnissamut inuunermullu sillimmasiinermik aaqqissuussinernut akiliutit kiisalu taakku akileraarutaat A-t uninngatinneqartut pillugit paasissutissat pineqartunut ilanngunneqarlutik. Paasissutissat pineqartut sulisitsisunit ilisimaarineqareerput.

Allannguutip tassunga ilutigitillugu kinguneraa akileraartussaasup taassumaluunniit sinniisuata, tak. aalajangersakkami imm. 2, akileraaruseriffiup taamaaliorsinnaaneratuulli paasissutissiisussaataasooq (nalunaaruteqartussaataasooq) qinnuigisinnaammagu paasissutissanik piffissami siusinnerusumi tunniusseqqullugu.

Nr. 4-mut

Siunnersuutaavoq inatsimmi § 30 a-mut innersuussineq inatsisip § 32-ani ilanngunneqassasoq.

Tassani soraarnerussutisiaqarnissamut inuunermullu sillimmasiinermut aaqqissuussinernut akiliutit pillugit § 30 a naapertorlugu paasissutissiisussaataanerup 1. januar 2018-imi atuutilersup kingunerisaanik allannguneq pineqarpoq.

§ 30 a-mut innersuussinermik ilanngussinerup kinguneraa aningaasarsiortup paasissutissat namminermut tunngasut § 30 a malillugu tunniunneqartut assinginiq tunineqartussaana. Tassa paasissutissiisussaataasup aningaasarsiortoq paasissutissat akileraaruseriffimmut tunniussani pillugit ilisimatissavaa. Tamanna aningaasarsiortup akissarsiaata allagartaatigut amerlanertigut pisareerpoq.

Nr. 5-imut

Aalajangersagaq 2006-ip kingorna allanngortinneqanngilaq. Aalajangersakkap imaraa Naalakkersuisut paasissutissiisussaataaneq pillugu erseqqinnerusumik maleruagassiornissamut arlalitsigut piginnaatinneqarnerat. Piginnaatitsissutit taakku imm. 1-imit 3-mut allannguutissatut siunnersuutitigut erseqqissarneqarnissaat siunnersuutaavoq. Maannamut periusiusup ingerlatiinnarneqarnissaa naatsorsuutaavoq.

Imm. 1-imut

Inatsimmi § 33, imm. 1-imut ilanngunneqarput inatsimmi §§ 33 a-33 g-mut kiisalu § 35-39-mut innersuussinerit, kiisalu oqaasertamik allannguneq, qaammatikkaartumik nalunaaruteqartarnerit aammalu ilisimatitsisussaataanerit pillugit maleruagassanik aalajangersaanissamut piginnaatitsissummik annertusisitsisoq. Ilisimatitsisussaataanerit

oqarnermi pineqartoq tassaavoq akileraaruseriffimmut nalunaarutiginninnermi pineqartumik ilisimatitsinissaq.

Inatsit § 33 c, imm. 3-ani aamma § 33 d, imm. 2-mi piginnaatitsissutit suliatigut peqatigiiffiit nalunaarutigisatik pillugit ilaasortaminnut ilisimatitsisussaatitaanerat pillugu maleruagassiornissami kiisalu Namminersorlutik Oqartussat nalunaarutigisatik pillugit ilinniagaqartunut ilisimatitsisussaatitaanerat pillugu maleruagassiornissami atugassatut atuutiinnarneqarput.

Piginnaatitsissut annertusineqarpoq, taamaalillutik Naalakkersuisut nalunaaruteqartussaatitaasut inatsit kapitali 6-iani pineqartut allat ilisimatitsisussaatitaanissaat pillugu maleruagassiorsinnaanngorlugit.

Tamatumani ilisimatitsisussaatitaanerit inatsimmi § 35 a, imm. 7-imi aamma imm. 8-mi aalajangersarneqartut, aningaasaqarnikkut ingerlatsiviit isumannaallisaanerup akornusigaanerani il.il. ilisimatitsisussaatitaanerannut tunngasut, nalunaarutikkut maleruagassiuunneqarsinnaanerit aamma ilaavoq. Tamannali aningaasaqarnikkut ingerlatsiviit § 35 a, imm. 7 aamma imm. 8 malillugit pinngitsooratik ilisimatitsisussaatitaanerannik allannguinngilaq. § 35 a, imm. 7 aamma imm. 8 malillugit ilisimatitsisussaatitaanerit pinngitsooratik pisartussaanerat 2016-imi ilanngunneqarpoq, taamaammallu taakku qasukkarneqarsinnaanngillat.

Piginnaatitsissut qaammatikkuutaartumik nalunaarutiginnittarneq pillugu maleruagassanik aalajangersaanissamut periarfissiisoq erseqqissarneqarpoq.

Paragrafinut innersuussinernik erseqqissaanerullunilu ilanngussineruvoq. Naalakkersuisut paasissutissanik tunniussisarneq pillugu maleruagassanik aalajangersaasinnaanerat erseqqissarneqarpoq.

Imm. 2-mut

Naalakkersuisut nalunaaruteqartussaatitaanernik qasukkaanissaq pillugu maleruagassiorsinnaanerit nalinginnaasumik piginnaatitsissutitut ingerlatiinnarneqarpoq. Aalajangersagaq nutaaq periutsimik atuuttumik erseqqissaanerusoq, tassa nalunaaruteqartussaatitaasut tamarmik paasissutissiissutigisassaat pillugit piumasaqaatinik qasukkaasinnaaneq pineqarpoq.

Taaguutit paasissutissiisussaatitaasut aamma nalunaaruteqartussaatitaasut inatsimmi assigiimmik isumaqartillugit atorneqarsorinarput, taamaalillunilu taaguutip arlaata toqqarnerani inatsisigut inissisimanermi assigiinngissuteqartoqanngilaq.

Maleruagassat atuuttut malillugit Naalakkersuisut, soorlu ilinniagaqarnersiutit, qitornanut akilersuutit, pisortanut tunisat aamma attartornernik isumaqatigiissutit aalajangersimasut, suliaqartut peqatigiiffiit ilaasortaanermi akiliutit, kontunik isumaginnittut nalunaarutaat, aningaasat isumagineqartut taarsigassarsiallu pillugit nalunaarutit paasissutissiisussaataatitaanermik qasukkaanissamut piginnaatitaanertik akileraaruseriffimmut isumagisassanngortinnikuuaat.

Periutsip taassuma nalunaarut ilaneqartussaq suliarineqalerpat atorneqarnissaa naatsorsuutaavoq, taamaalilluni akileraaruseriffik paasissutissiisussaataasut ataasiakkaat ataatsimoortulluunniit, pissutissaqartillugu aammalu paasissutissat akileraarutissanik misissuineri pisariaqavitsinnagit paasissutissiisussaataatitaanermik nalinginnaasumik tunniussisussaatsinnginnissaq qasukkaanissarlunniit pillugit aalajangiinissamut piginnaatinneqarluni. Soorlu aningaasat nalunaarutigisassat minnerpaaffissaannik angissusiliinissaq imaluunniit sulisitsisut ilaat ilaassapput, soorlu aalajangersimasumik amerlassusilinnik sulisoqartut paasissutissiisussaataatitaanerat annikilliliiffigalugu.

Imm. 3-mut

Inatsimmi § 33-p naggataa imm. 3-mi ingerlatiinnarneqarpoq. Periutsimik suleriaatsimilluunniit allannguinnissaq siunertaanngilaq.

Imm. 4-mut

§ 33, imm. 4-mut siunnersuut nutaajuvoq. Matumani paasissutissiisussaataasut inatsimmi kapitali 6-imi ilaatinneqartut aamma inatsisinik piareersaanermi, naatsorsueqqissaanermi ilisimatusarnermilluunniit siunertalinnut atugassatut paasissutissiinissamik aamma peqquneqarsinnaanerat pillugu maleruagassiorsinnaanermik Naalakkersuisut piginnaatinneqarput, naak paasissutissat toqqaannartumik akileraartarnermi pissutsinut attuumanngikkaluartut. Aalajangersagaq ingammik nalunaaruteqartussaataasut, inatsimmi § 30-mut, tassa sulisitsisunut aningaasarsianik A-nik tunniussisartut ilaatinneqareersunut.

Tassaasinnaapput paasissutissat akileraarusiineri akileraarutissallu naatsorsorneranni atorneqartussaannigitsut, tassa imaappoq paasissutissat Kalaallit Nunaanni oqartussaasut allat inatsissanik piareersaanermi, ilisimatusarnermi naatsorsueqqissaarnissamilu taamaallaat atugasattut ingerlateqqitassatut akileraaruseriffiup pissarsiariniartagai. Paasissutissat inatsisinik piareersaanissaq, ilisimatusarneq naatsorsueqqissaarnissarlugu pillugit misissuineri atugassatut nalunaarutigineqartut ingerlateqqinneqartullu siunertanut allanut kingusinnerusukkut atorneqassanngillat. Tassa imaappoq paasissutissat kingusinnerusukkut akileraaruseriffiup inuit aalajangersimasut pillugit suliaqarnermi atussanngilai.

Paasissutissat aalajangersakkami nutaami pineqartussat assersuutigalugu atorfiup suunera aamma nal.ak. akissarsissutigineqartut tassaassangatinneqarput.

Nal.ak. akissarsissutigineqartut tassaapput nal.ak. sulisitsisup akissarsisitsissutai, tassaasut akissarsiat aningaasarsiat A-tut il.il. nalunaarutigineqartussat. Nal.ak. akissarsissutigineqartut ilaatigut tassaapput nammineerluni sulinikkut akissarsiat tunniunneqartut. Ilaatigullu tassaapput nal.ak. sulisup akissarsissutigisai, sulisoq suliaqanngikkaluartorluunniit. Soorlu tassaasinnaavoq piffissaq sulinngiffeqarfissaq, piffissaq suliunnaarfik sulisup soraarsitaaffia, imaluunniit piffissaq ernisimalluni, napparsimalluni sulinngiffik imaluunniit ulloq qitornap napparsimaaffia siulleq.

Paasissutissat taamaattut Naatsorsueqqissaartarfiup siunissami atorsinnaavai akissarsianik naatsorsueqqissaarnermi, ilaatigut arnat angutillu akissarsiatigut assigiinngissutaannik ersersitsiniarnermi atugassatut.

Paasissutissat taakku sulisitsisup inatsimmi § 32 naapertorlugu ilisimatitsissutigisassaatur ilanngutissallugit pisariaqarpasinngilaq. Nalunaarsorneqartup akuersiseqqaarnissaa allal-luunniit akuersinissat piumasaqaataannngilaq.

Imm. 5-imut

§ 33, imm. 5-imi maleruagassatut siunnersuut nutaajuvoq § 33, imm. 4-milu maleruagassatut siunnersuutaasumut attuumassuteqarluni.

Siunnersuutaavoq paasissutissat pineqartut qinnutigineqarnerisigut akileraaruseriffiup Kalaal-lit Nunaanni oqartussaasunut allanut, matumani aamma Naatsorsueqqissaartarfimmut ingerlateqqissinnaassagai, taakku naatsorsueqqissaarnissaminni ilisimatusarnissaminnillu atugassaattut.

Nr. 6-imut aamma nr. 7-imut

Inatsimmi § 33 c, imm. 3, aamma § 33 d, imm. 2, atorunnaarput.

§ 33, imm. 2-mik erseqqissaanerup kingunerisaanik allannguinerupput.

Nr. 8-mut, nr. 9-mut aamma nr. 10-mut

Inatsimmi § 33 e, imm. 3, § 33 f, imm. 2 aamma § 33 g, imm. 3 atorunnaarput.

§ 33, imm. 1-imik erseqqissaanerup kingunerisaanik allannguinerupput.

Nr. 11-mut, nr. 13-imut aamma nr. 14-imut

Inatsimmi § 36, imm. 2, § 37, imm. 2 aamma § 39, imm. 3 atorunnaarput.

§ 33, imm. 1-imik erseqqissaanerup kingunerisaanik allannguinerupput.

Nr. 12-mut

Matumani § 36, imm. 2-p atorunnaarsinneqarnerata kinguneranik allannguneq pineqarpoq.

Nr. 15-imut aamma nr. 16-imut

§ 40, imm. 5-ip aamma imm. 7-ip oqaasertai nutaajupput, Aningaasarsianit akileraarutit pillugit Inatsisartut inatsisaata allannguutissaatut siunnersuutigineqartut kingunerisaannik. Kii-salu inatsisinut innersuussinerit ilanngunneqarput.

Siunnersuutaavoq aalajangersagaq (imm. 5) ilallugu ilanngunneqassasoq ingerlatseqatigiiffiit Erngup nukingata nukissiornermut atorneqartarnera pillugu Inatsisartut inatsisaat naapertorlugu akuersissummik pigisaqartut aningaasarsianit akileraarutaat iluanaarutisianillu akileraarutaat pineqartunut ilaassasut. Taamaattumik ingerlatseqatigiiffinit, inatsit siuliani taaneqartoq naapertorlugu akuersissummik pigisaqartunit akileraarutitigut isertitat, ingerlatseqatigiiffiit Aatsitassat pillugit ingerlatallu tamatumunnga pingaarutillit pillugit Inatsisartut inatsisaat naapertorlugu akuersissummik pigisaqartut akileraarutaasa pineqarnerattulli agguataarneqassapput. Siunnersuutaavortaaq ingerlatseqatigiiffiit Aningaasarsianit akileraarutit pillugit Inatsisartut inatsisissaanni kapitali 3 b-mi pineqartut aningaasarsianit akileraarutaat iluanaarutisianillu akileraarutaat aammattaaq Nunatta karsiata pisassarissagai. Aningaasarsianit akileraarutit pillugit Inatsisartut inatsisaanni kapitali 3 b-mi pineqarput ingerlatseqatigiiffiit iluanaarutisiassatut agguaassaminnik ilanngaateqarsinnaanngitsut. Tassani eqqarsaatigineqarpoq kapitali 3 b-mi pineqarmata ingerlatseqatigiiffiit aatsitassarsiornermik erngullu nukinganik atuineramik ingerlataqartut, isertitaallu Nunatta karsianit pisassarineqartut. Taamaalilluni qulakkeerneqarpoq isertitassat assigiaartumik agguataarneqartarnissaat.

Aalajangersakkat malillugit ilaatigut aatsitassarsiornermi ingerlatseqatigiiffiit ingerlatseqatigiiffiit akileraarutaanut isertitat Nunatta Karsianut nakkartinneqartarput. Taamaattoq Kalaallit Nunaanni Aatsitassanut Aningaasaateqarfik pillugu malittarisassat malillugit isertitat taakku aatsitassanut aningaasaateqarfimmut nakkartinneqartarput.

Siunnersuutaavoq ernianit akileraarutit siunnersuut (imm. 7), ingerlatseqatigiiffiit akileraarutaattulli Nunatta karsiata, kommunip akileraarfiusup kommunillu pisassarissagaat.

Nr. 17-imut

§ 44 a-tut siunnersuut nutaajuvoq. Aalajangersagaq Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisissaattut siunnersuutip (UKA 2023/18) matuma ilutigisaanik saqqummiunneqartup kinguneraa, tassani naatsorsuutigineqarluni iluanaarutisianit akileraarutitik utertitsisarnissami suliaassat amerlisinnaanerit aammalu aningaasat uninngatinneqartut tunniunneqartut amerlisinnaanerit.

Aalajangersagaq akileraaruseriffiup iluanaarutisianit akileraarutininik, ernianik imaluunniit royaltynik utertitsivigineqarnissamik piumasarineqartuninik, marloriaammik akileraannginnissaq pillugu isumaqatigiissut tunngavigalugu utertinneqartussanik tunniussinissamut sivisunerusumik piffissaqarnissaanik atuutilersitsissaaq. Siunnersuut malillugu utertitsineq kingusinnerpaamik akileraaruseriffiup qinnuteqaammik tigusaqarneraniit kingusinnerpaamik qaammatit arfinillit qaangiutinnginneranni pisassaaq.

Piumasarineqartut piffissaliussap iluani tunniunneqanngippata pissarsisussamut, erniap § 44, imm. 4 naapertorlugu naatsorsorneqartup amerlaqataanik ernialiisoqassaaq.

Aalajangersakkap imm. 2-ani allaqqavoq akileraaruseriffik utertitsivigineqarnissamik qinnuteqaammik misissuisinnaanngippat imm. 1 naapertorlugu piffissaliussaq unitsinneqassasoq. Tamannali taamaallaat atuutissaaq tamanna tunineqartussamut tunngasunik pissuteqarpat, matumani aamma uppersaaratit saqqummiunneqartut naammanngippata, assersuutigalugu qinnuteqartup iluanaarutisianik tunniunneqartuninik ilumut piginnittuiuppat qinnuteqartullu iluanaarutisianik tigusaqarsimanera uppersarneqanngippat imaluunniit aningaasanut tunngasut erseqqinngippata paasiuminaappataluunniit.

Aalajangersakkap imm. 3-ani allaqqavoq akileraaruseriffik qularnaveeqquseeqqusisinnaasoq, aningaasanik tunniussinissaq annasaqarsinnaanermik nassataqassangatinneqaraangat. Tassanili piumasaqaataavoq suliap isumaqatigiinngissutaalluni Akileraarusiinermilu Aalajangiisartunit eqqartuussivinnilluunniit suliarineqarnera.

Nr. 18-imut

§ 45 a-tut siunnersuut nutaajuvoq. Aalajangersakkap akileraaruseriffik pisassarisaat ernianik naatsorsuiffiusumi erniaasa 100 kr.-nik minnerusumilluunniit amerlassuseqarneranni ernialersuinnginnissamik periarfissaqarneranik imaqarpoq.

Maleruagassaq pisassarisanut ataasiakkaanut atuuppoq, kisianni akileraarutinit akiitsut ataasiakkaat piffissani ernianik naatsorsuiffiusuni ataasiakkaani erniai tamarmiusut annerpaamik 100 kr.-ussapput.

Taamattaaq § 45 b-p nutaamik oqaasertalerneqarnera aamma nutaajuvoq. Aalajangersakkami ilanngunneqarput akileraaruseriffiup ernialersuinermit unitsitsisinnaanera aamma isumakkeerisinnaanera. Maleruagassatut siunnersuutaavoq akileraaruseriffik akileraartartumut ernialiunneqartuninik taakkulu tunngaviinik naliliisassasoq. Matumani piumasaqaataavoq akileraartartup paasissutissat pisariaqartinneqartut tamaasa piffissaagallartillugu nassiutissagai aamalu akileraaruseriffik paasissutissanik amerlanerusunik nassiusseqqusilluni qinnuiginnippat tamatuminnga malinnissimanissaa.

Maleruagassap ilaatigut killilerujussuarmik atorneqartussaagunarpoq, aatsaallu akileraaruseriffiup kukkunera nalorninaatsumik paasineqarpat atorneqartussatut naatsorsuussaalluni.

Taamattaaq maleruagassaq atuuttassaaq ernialiunneqartut siusinnerusukkut missingersuilluni amerlassusilikkamut, kingusinnerusukkulli appartinneqartumut tunngasuugaangata, aammalu missingersuilluni angissusiliineq naammanngitsunik tunngaveqarluni pisimatillugu. Tassa imaappoq pisassarizat (akileraarutinit akiitsut) pinngorsimassapput missingersuilluni amerlassusiliinerup, kingusinnerusukkulli akileraaruseriffimmit imaluunniit Akileraarusiinernik aalajangiisartunit appartinneqartup kingunerisaanik, kiisalu ukiumi aningaasarsiorfiusumi pineqartumi missingersuilluni qaffaaneq ukiuni siusinnerusuni aningaasarsianit qaffasinnerungaatsiarpat, suliamut tunngatillugu maannamut paasissutissaatineqartut tunngavigalugit.

Maleruagassaq aammattaaq atuutissaaq suliaq piffissami siusinnerusumi akileraaruseriffiup aalajangiiffigisimappagu piffissami tassanerpiaq ernialersuisoqarnissaa pisimassanngikkaluartoq takuneqarsinnaappat, kiisalu suliap suliarineqarnerata sivilissusaa akileraartartumut tunngasunik pissuteqanngippat, matumani aamma paasissutissanik akileraarusiinermi atugassanik nassiussinngitsoortoqarpat.

Taamattaaq maleruagassaq atuutissaaq ernialersuutigineqartut piffissamut akileraartartup, suliap akileraaruseriffimmit suliareqqinneqarnissaanik qinnuiginninnerata kingornanut tunngappata, taavalu akileraarutissanik angissusiliineq taassuma kingorna appartinneqarpat, akileraarutissanik angissusiliineq siulleeq akileraartarnermut ingerlatsiviup ilisimasariaqagaraluanik erseqqissumik kukkunerit pissutigalugit, soorlu sulisitsisup annertuumik kukkusumik nalunaaruteqarnera imaluunniit ilanngaattissat nammineerluni nalunaarsuiffimmi ilanngaatinngitsoorneqarneri pissutigalugit. Taamaattoqartillugu piumasaqaataavoq akileraartartup suliamik suliareqqiinnissaaq piffissaagallartillugu qinnutigissagaa tassungaluppennarsaatinik naammattunik nassiussinissaa, taamaalilluni piffissaaq suliap suliarineqarfia akileraaruseriffiup kisimi pisuussutigissallugu.

Ernialersuinermik unitsitsinissamik aalajangerneq akiitsullip takussutissiineranik tunngaveqarsinnaavoq imaluunniit akileraaruseriffiup nammineq sulissuteqarnermigut naliliineranik tunngaveqarsinnaalluni.

Akileraaruseriffiup akileraarutinit akiitsunik ernialersuineq nangeqqissinnaavaa paasissutissat nutaat, akileraaruseriffiup ernialersuinermik unitsitsinissaaq aalajangiunneqarmat paasissutissaatinngisai pigineqalerpata. Matumani aamma akileraartartup akileraarutissaanik angissusiliineq pillugu aalajangiineq nutaaq paasissutissat naammattut tunngavigalugit pippat.

Aalajangersagaq §§ 53-55-imut maleruagassanut isumakkeerisarnermut tunngasunut attuumassuteqanngilaq, tamannalu ilaatigut pissutaavoq akileraaruseriffiup ernialersuineramik unitsitsinissaq ernialersuinnginnissarlunniit pillugit aalajangiineri akileraarutininik, ernianik il.il. isumakkeerinissaq pillugu suliaqartoqassagaluarpat aalajangiisuunavianngimmata.

Nr. 19-imut

§ 47 a siunnersuutigineqartoq nutaajuvoq. Aalajangersakkakut akileraartarnermut ingerlatsiviup aningaasarsianit akileraarutit pillugit Inatsisartut inatsisaanni § 30, imm. 1, uniffiit pingajuat naapertorlugu, amigartoorutit kinguartinneerisa sivitsorneqarnissaannut periarfissakkut, annertussusiliinermik suliarinneqqinnissamut periarfissaata sivitsornissaa qulakkeerneqassaaq.

Aningaasarsianit akileraarutit pillugit Inatsisartut inatsisaanni maleruagassat malillugit, akileraartussaataasut amigartoorutininik (amigartoorutitut akileraaruserneqartussaataasutut isertitanik) ukiut isertitaqarfiit tulliit tallimani kinguartsinissaapput. Aningaasarsianit akileraarutit pillugit inatsisartut inatsisaannut UPA2023-mi allannguutissatut siunnersuutikkut, akileraarusiisarnermi amigartoorutit atorneqarnissaannut killiliussap ukiunut qulinut sivitsorneqarnissaa siunnersuutigineqarpoq.

Taamaammat piffissaliussani akileraartartup amigartoorutininik kinguartsinissaanerani, piffissamilu akileraartarnermut ingerlatsiviup nalinginnaasumik akileraarusiussassatut aalajangiinermik suliarinneqqissinnaanerani nikingasoqarsinnaavoq. Malittarisassat atuuttut naapertorlugit akileraartarnermut ingerlatsiviup, immikkut ittumik annertussusiliinissamut tunngavissat naammassineqartillugit, taamaallaat ukiut amigartoorfiusut tallimat sinnerlugit sioqqutsisut suliareqqissinnaavai.

Taamaammat immikkut ittumik suliamik suliarinneqqinnissamut killiliussap, ukiut isertitaqarfiusut tallimat qaangerlugit amigartoorutininik ukiumut isertitaqarfimmut kinguartsinikkut atorneqartut kingorna ukiunut marlunnut kinguartinneqarnissaa siunnersuutigineqarpoq. Taamaalilluni § 47, imm. 1 aamma imm. 4 kiisalu ukioq isertitaqarfiusup amigartoorutip pilerfigisaa sanioqqunneqarpoq, suliarlu ukiut isertitaqarfiusut tulliuttut tallimat qaangerneranni suliareqqinneqarsinnaavoq.

Malittarisassat atuuttut naapertorlugit akileraartarnermut ingerlatsivik ukiup isertitaqarfiusumit ukiut tallimat qaangiunneranni 31. oktober tikillugu nalinginnaasumik suliamik suliarinneqqissinnaavoq, tak. § 47. § 47 a-mi aalajangersagaq nutaaq akileraartarnermut ingerlatsiviup ukiut isertitaqarfiusuni qaangiuttuni, tassa ukiut isertitaqarfiusut tallimaanni kingusinnerusukkullu, amigartoorutip atorneqarnerani ukiut isertitaqarfiusut marluk kingorna 31. december tikillugu nalinginnaasumik suliamik suliarinneqqissinnaavoq.

Aalajangersakkat nutaat aalajangersaanernut amigartoorutip annertussusaanut sunniuteqartunut taamaallaat atuupput. § 47 a-p atorneqarnerani aningaasarsianit akileraarutit pillugit Inatsisartut inatsisaanni § 30, imm. 1 uniffiit pingajuat malillugu amigartoorutit kinguartinneqartut aatsaat pineqarnerat tunngavissaatinneqarpoq. Tassani amigartoorutit ukiumi isertitaqarfiusumi ulloq 1. januar 2018 kingorna aallartittumi pilersut pineqarput.

	Ukioq isertitaqarfik amigartooru- teqarfiusoq	Amigartoorut kr.-nngorlugu	Ukioq isertitaqarfik amigartoorutip kinguartin- neqarfia	Amigartoorut kinguartinneqartoq kr.-nngorlugu.	Akileraartarnermut ingerlatsiviup ukioq isertitaqarfimmi 2018-imi suliaq ulloq taaneqartoq tikillugu suliareqqissin- naavaa
Asser- suut 1	2018	500.000	2028	500.000	31.12.2030
Asser- suut 2	2018	500.000	2022	250.000	31.10.2023
	2018	500.000	2023	250.000	31.12.2025
Asser- suut 3	2018	500.000	2023	250.000	31.12.2025
	2018	500.000	2024	250.000	31.12.2026

Assersuut 1: Amigartoorut ukioq isertitaqarfik 2018-imi pilersimappat, tamanna annertunerpaamik atuinnermi ukiut isertitaqarfiusut tulluittut qulini amigartoorutit kinguartsinermut atorneqarsinnaavoq, tassa ukioq isertitaqarfiusoq 2028-mut, tamatumani ukiuni isertitaqarfiusumi atuuffinni naammattumik annertussusilimmik akileraarusigassatut isertitanik sinneqartoortoqartinnagu. Taamatut pisoqartillugu akileraartarnermut ingerlatsivik § 47 a malillugu ukioq isertitaqarfik 2018-imi ulloq 31. december 2030 tikillugu nalinginnaasumik suliamik suliarinneqqissinnaavoq.

Assersuut 2: Amigartoorut ukioq isertitaqarfik 2018-imi pilersoq, ilaannatortumik 2022-mut 2023-mullu kinguartinneqassaaq. Taamatut pisoqarnerani akileraartarnermut ingerlatsiviup maanna § 47-mi aalajangersagaq atuuttoq malillugu, ukioq isertitaqarfiusoq 2018 31. oktober 2023-p tungaanut suliareqqissinnaavaa. Tamatuma saniatigut ukioq isertitaqarfiusoq 2018 pillugu suliat, amigartoorutillu 2023-mut kinguartinneqartup ilaata ulloq 31. december 2025 tikillugu suliareqqinnissaanut akileraartarnermut ingerlatsivik periarfissaqarpoq.

Assersuut 3: amigartoorut ukioq isertitaqarfik 2018-imi pilersoq ilaannakortumik 2023-mut 2024-mullu kinguartinneqassaaq. Taamatut pisoqartillugu akileraartarnermut ingerlatsiviup § 47 a-tut aalajangersagassatut siunnersuutigineqartoq nutaaq malillugu, ukioq isertitaqarfik 2018-imi suliaq ulloq 31. december 2025 kiisalu ulloq 31. december 2026 tikillugit

suliatereqqissinnaavai, amigartoorutillu ilai 2023-mut 2024-mullu kinguartinneqartut nalimmassaarlugit.

Nr. 20-imut

§ 59, imm. 2-p oqaasertaasa erseqqissarneqarnissaat siunnersuutaavoq, tassa paasissutissat suut akileraaruseriffiup nalunaaruteqartussaataasumut qinnutigisinnaanera.

Nalunaaruteqartussaataasup akileraaruseriffiup qinnuiginninneratigut atortut paasissutissanut nalunaarutigineqartussanut tunngaviusut nassiutissavai. Aalajangersakkap oqaasertai ima erseqqissarneqarput oqaasertaani toqqaannartumik allaqqalerluni, paasissutissat pineqartut aamma tassaammata paasissutissat nalunaarutigineqartussat aalajangersimasut nassiunneqarnissaannik naliliinissami atugassat.

Erseqqissaaneq OECD-p Kalaallit Nunaata akileraartarnermut inatsisaanik, CRS-imik (Common Reporting Standard) maleruagassanik atuilerneq atuutsitsinerlu eqqarsaatigalugit nalilersuisimaneranik tunngaveqarpoq. OECD-p sulinermini tassani paasivaa Kalaallit Nunaata inatsisai nunallu assigiinngitsut periusii, Global Forum, OECD-mit aalajangersagaasut imminnut naapertuutinngitsortaqaalaartut.

CRS-ip siunertaraa nunarsuarmi sumiikkaluaraanniluunniit akileraarutini akiliisarnissap qulakkeernissaa aamma nunat akornani akileraarnaveersaarluni iliuuserineqartartunik akiuiniarnissaq. Tamanna pingaarnertut nunat tamarmik iluminni nalunaaruteqartussaaneq pillugu maleruagassaqaarnerisigut, nunat akileraartarnermut oqartussaasuisa akornanni paasissutissanik nalunaarutigineqartunik paarlaateqatigiittarnerannut iluaqutaasunik qulakkeerneqarpoq.

Aningaaseriviit, inuunermut sillimmasiisarfiit allallu aningaasaqaarnermik ingerlatsiviit aningaasaatinut kontot toqqorsiviillu inunnit suliffeqarfinnillu nunanit allaneersunit pigineqartut CRS-imut nalunaarutigisussaavai.

Nr. 21-mut

§ 68 a-tut siunnersuutigineqartoq nutaajuvoq. Akit nammineq aalajangersarlugit nuussinernut uppersarsaatiniq suliaqartoqanngippat akileraaruseriffiup missingersuilluni angissusiliisinnaaneranik erseqqissaanissaq siunnersuutaavoq. Uppersarsaatit allaganngorlugit suliat nammineerluni nalunaarsuiffiusumi naammattumik suliaassapput, taamaammallu uppersarsaatit kingusinnerusukkut suliarineqarnerat naammangilaq.

Uppersarsaatit Aningaasarsianit akileraarutit pillugit Inatsisartut inatsisaanni § 36 b, imm. 2-mi maleruagassat naapertorlugit suliaatillugu tunniunneqarpata piffissaagallartillugu suliaasutut aatsaat isigineqassapput. Ukioq aningaasarsiorfimmuut tunngatillugu uppersarsaatit ullormi nammineerluni nalunaarsuiffimmik tunniussiffiusumi piariissapput. Akileraartartulli

uppersaatsissanik qinnuigineqarnerminnik tigusinnerminnit, uppersaatinik nassiusississamut ullunik 60-inik piffissaqarput. Akileraartartut aammattaaq § 36 b, imm. 2 naapertorlugu nalunaarut atuutilertoq aqutugalugu pisussaaffilerneqarsinnaapput, qinnuigineqanngikkaluarlutik nammineeeluni nalunaarsuiffimmik tunniussivissap qaangiunneranit kingusinnerpaamik ullut 60-it qaangiunneranni uppersaatinik tunniusseqqullugit.

Uppersaatis piffissaagallartillugu suliarineqanngippata akileraaruseriffik, akit nammineq aalajangersarlugit nuussinernik missingersuilluni angissusiliinissamut piginnaatitaavoq. Taamaammat aningaasarsianik akileraartussanik angissusiliineq, akit nammineq aalajangersarlugit nuussinerit attuumassuteqannginnissamik periutsit tunngavigalugit niuernerminni nuussinnertut naatsorsorlugit pisinnaavoq, tak, Aningaasarsianit akileraarutit pillugit Inatsisartut inatsisaanni § 36 a.

Aalajangersakkap imm. 2-ani naatsorsuutitut atortunik § 58, imm. 1 naapertorlugu qinnuiginnittoqaraluartoq nassiusisoqanngippat missingersuilluni angissusiliinissaq atuutissasoq aamma aalajangersarneqarpoq.

Imm. 3-mi aalajangersakkami siunnersuutaavoq akileraartartut isertitakinnerusut akit nammineq aalajangersarlugit nuussinerit § 39, imm. 4, nr. 1-3-mi pineqartut kisiisa pillugit uppersaasiortussat pineqaraluarpataluunniit aalajangersagaq aamma atuutissasoq. Taakku soorlu tassaasinnapput illuatungeriit, nunani Kalaallit Nunaata marloriaammik akileraannginnissaq pillugu isumaqatigiissuteqarfiginngisaaniittut akit nammineq aalajangersarlugit nuussineri.

§ 2-mut

Inatsisartut inatsisaat ulloq 1. januar 2024 atuutissasoq siunnersuutaavoq.

Siunnersuut inatsimmut atuuttumut sanilliullugu	
<i>Oqaasertaa atuuttoq</i>	<i>Siunnersuut</i>
	<p>§ 1</p> <p>Akileraaruserinermik ingerlatsineq pillugu Inatsisartut inatsisaanni nr. 11, 2. november 2006-meersumi, tak. Namminersorlutik Oqartussat nalunaarutaat nr. 11, 3. november 2021-meersoq, Inatsisartut inatsisaatigut nr. 12, 1. december 2021-mi allanngortinneqartumi aamma Inatsisartut inatsisaat nr. 20, 21. november 2022-meersukkut kingullermik allanngortinneqartumi makku allannguutigittinneqarput:</p>
	<p>1. § 10-p kingorna ilanngunneqarpoq:</p> <p>”Immikkoortoq I a</p> <p><i>Nunat assigiinngitsut kattuffii</i></p> <p>Kapitali 3 a</p> <p><i>Nunat assigiinngitsut kattuffiisa akiliisinneqannginnissaat</i></p> <p>§ 10 a. Naalakkersuisut isumaqatigiissuteqarnermikkut nunani assigiinngitsuni kattuffiit suliffeqarfiilluunniit akileraarutininik akitsuutinillu pisussaaffinnillu allanik, akileraartarnermut akitsuusiisarnermullu inatsisini allaqqasunik oqilisaanneqarnissaat akiliisinneqannginnissaalluunniit akuerisinnaavaat, tamanna kattuffiup suliffeqarfiilluunniit siunertaata naammassinissaanut suliassaatalu isumannaarnissaanut pisariaqarpat.</p> <p><i>Imm. 2.</i> Taamaaqataanik pisinnaatitaaffeqartussatut</p>

	<p>akiliisinneqanngitsussatullu akuerineqarsinnaapput:</p> <ol style="list-style-type: none"> 1) Kattuffinni suliffeqarfinnilu imm. 1-imi taaneqartuni aallartitatut atorfeqartut taakkulu ilaqutaat. 2) Paasisimasallit kattuffinni suliffeqarfinniluunniit imm. 1-imi taaneqartuni suliassanik suliaqartut. 3) Inuit saqitsaassutit suliarineqarneranni, kattuffiit suliffeqarfiillu imm. 1-imi taaneqartut sinnerlugit peqataasut. <p><i>Imm. 3. Naalakkersuisut isumaqatigiissutit manna aalajangersakkami taaneqartut naammassineqarnissai pillugit iliuusissat erseqqinnerusut aalajangerneqarnissaannut piginnaatinneqarput.”</i></p>
<p>§ 30 a.</p> <p><i>Imm. 2. § 30-mi, imm. 1, nr. 5 aamma 6-imi, kiisalu imm. 2-5-imi aalajangersakkannut aamma atuutissaaq.</i></p>	<p>2. § 30 a, imm. 2, ima oqaasertaqarpoq:</p> <p><i>” Imm. 2. § 30, imm. 1, nr. 4-mi 5-imilu aamma imm. 2-mit 5-imut aalajangersakkat taamatulli atuupput.”</i></p>
<p>§ 31. Tigusisartog § 30-mi taaneqartunik isertitaqartog Kalaallit Nunaanni akileraartussaataajunnaarpat, paasissutissiisussaataasog qinnuigineqarnini malillugu paasissutissiissaaq § 30-mi ukiup aallartinneraniit akileraartussaataitanerup atorunnaarnerata tungaanut pineqartup aningaasarsiaanik kiisalu akileraarutit A-t unerartitat annertussusaannik.</p>	<p>3. § 31, imm. 1, ima oqaasertaqarpoq:</p> <p><i>” Aningaasarsianik § 30-mi taaneqartunik pisartog Kalaallit Nunaanni akileraartussaajunnaarpat, paasissutissiisussaataitap qinnuigineqarnini malillugu § 30-mi § 30 a-milu taaneqartut paasissutissiissutigissavai:</i></p> <ol style="list-style-type: none"> 1) Pineqartup qaammatisiutit malillugit ukiup aallartinneraniit piffissap akileraartussaajunnaarfimmi tungaanut aningaasarsiai, 2) soraarnerussutisiaqarnissamut inuunermulluunniit sillimmasiineramik aaqqissuussinermut akiligai kiisalu 3) akileraarutit A-t uninngatinneqartut amerlassusii.”
<p>§ 32. § 30 aamma § 31, imm. 1 malillugu aningaasarsiaqartog pillugu paasissutissat assilineranik aningaasarsiaqartog tunineqassaaq.</p>	<p>4. § 32 ima oqaasertaqarpoq:</p> <p><i>” § 32. Paasissutissat aningaasarsianik pisarsisumut tunngasut § 30, § 30 a aamma § 31, imm. 1 naapertorlugit paasissutissiissutigineqartut assilineraneri aningaasarsianik pissarsisup pissavai.”</i></p>

<p>§ 33. §§ 30-32 malillugit paasissutissiis-sutaasussat pillugit malittarisassanik Naalakkersuisut aalajangersaasinnaapput, taassumalu ataani paasissutissanik tunni-ussisussaatitaasut immikkoortuinut paasissutissiis-sutaasussanut piumasaqaatit oqilisinnissaannut. Naalakkersuisut aamma malittarisassanik aalajangersaasinnaapput, taassuma kingorna tiguisumut isertitat A-junngitsut eqqarsaatigalugit § 30, malillugu immikkut paasissutissiisoqarsinnaanngorlugu. Akiliutigineqartut piffissap aningaasarsiorfiusup naareernerani akileneqartut ukiumi sorlermi nalunaarutigineqarnissaat pillugu Naalakkersuisut malittarisassanik aalajangersaasinnaapput.</p>	<p>5. § 33 ima oqaasertaqarpoq: ” § 33. Naalakkersuisut paasissutissat §§ 30-32-mut, §§ 33 a-33 g-mut aamma §§ 35-39-mut naapertorlugit tunniunneqarnissaat, matumani ilanngullugit qanoq akuttutigisumik tunniunneqartarnissaat aamma ilisimatitsisussaatitaaneq pillugit maleruagassanik aalajangersaasinnaapput. <i>Imm. 2.</i> Naalakkersuisut nalunaaruteqartussaataasut imm. 1 naapertorlugu nalunaaruteqarnissaannut piumasaqaatit qasukkarneqarnissaat pillugu maleruagassanik aalajangersaasinnaapput. <i>Imm. 3.</i> Naalakkersuisut aningaasarsiat pissarsisup aningaasarsiaatut A-tut isigineqanngitsut pillugit paasissutissat § 30 naapertorlugu immikkoortillugit tunniunneqarnissaat pillugu maleruagassanik aalajangersaasinnaapput. Naalakkersuisut tunniunneqartut piffissaq pisassanngorfiat qaangiutereersoq tunniunneqartut pillugit paasissutissat ukiumi sorlermi nalunaarutigineqarnissaat pillugu maleruagassanik aalajangersaasinnaapput. <i>Imm. 4.</i> Naalakkersuisut kapitali una naapertorlugu inatsisinik piareersaanermi, naatsorsueqqissaarnermi ilisimatusarnermiluunniit atorneqartussanik nalunaarutiginnittussaataasut akileraaruseriffimmut paasissutissanik amerlanerusunik nassiussisarnissaat pillugu maleruagassanik aalajangersaasinnaapput. <i>Imm. 5.</i> Paasissutissat imm. 4 naapertorlugu nalunaarutigineqartut akileraaruseriffiup qinnuigineqarnermigut Nunatsinni oqartussaasunut allanut, inatsisinik piareersaanermi, naatsorsueqqissaarnermi ilisimatusarnermiluunniit atorneqartussatut ingerlateqqissinnaavai.”</p>
<p>§ 33 c. <i>Imm. 3.</i> Naalakkersuisut malittarisassanik aalajangersaasinnaapput, imm. 1-imi sulinermi peqatigiiffiit taaneqartut</p>	<p>6. § 33 c, imm. 3, atorunnaarpoq.</p>

nalunaaruteqarneq pillugu ilaasortaminnut ilisimatitsinissamut pisussaaffeqartut.	
§ 33 d. <i>Imm. 2.</i> Naalakkersuisut malittarisassanik aalajangersaasinnaapput Kalaallit Nunaanni Namminersorlutik Oqartussat nalunaaruteqarneq pillugu ilinniagaqartumut ilisimatitsinissamut pisussaaffeqarnerat pillugu.	7. § 33 d, imm. 2, atorunnaarpoq.
§ 33 e. <i>Imm. 3.</i> Naalakkersuisut imm. 1 aamma 2 malillugit paasissutissanik tunniussisarneq pillugu maleruagassanik erseqqinnerusunik aalajangersaasinnaapput.	8. § 33 e, imm. 3, atorunnaarpoq.
§ 33 f. <i>Imm. 2.</i> Naalakkersuisut imm. 1 malillugu paasissutissanik tunniussisarneq pillugu maleruagassanik erseqqinnerusunik aalajangersaasinnaapput.	9. § 33 f, imm. 2, atorunnaarpoq.
§ 33 g. <i>Imm. 3.</i> Naalakkersuisut imm. 1 aamma 2 naapertorlugu paasissutissanik tunniussineq pillugu malittarisassanik sukumiinerusunik aalajangersaasinnaapput.	10. § 33 g, imm. 3, atorunnaarpoq.
§ 36. <i>Imm. 2.</i> Imm. 1 malillugu paasissutissiissutigineqartussat pillugit Naalakkersuisut annertunerusunik malittarisassiorsinnaapput.	11. § 36, imm. 2, atorunnaarpoq.
§ 37. § 36, imm. 1 malillugu kontomik pilersitsisoq kontomik piginnittup inuttut normua imaluunniit selskabip nalunaarsorneqarnerani normua paasissutissiissutigissavaa. § 36 malillugu paasissutissiisussaataasut kontomik piginnittup inuup normuanik imaluunniit nalunaarsorneqarnermi normumik akileraaruseriffiup paasisissinnaavai.	12. § 37, imm. 1 ima oqaasertalerneqassaaq: ” § 36-mi taaneqartutut kontumik pilersitsisoq, kontumik piginnittup inuup normuanik ingerlatseqatigiiffiulluunniit nalunaarsorneqarnerani normuanik nalunaarutiginnissaaq. Akileraartarnermut ingerlatsivik § 36 naapertorlugu kontumik piginnittup inuup normuanik nalunaarsuinermiluunniit normuanik nalunaaruteqartussaataasumut nalunaarutiginnissinnaavoq.”

<p>§ 37. <i>Imm. 2.</i> Imm. 1 malillugu paasissutissiissutigineqartussat pillugit Naalakkersuisut malittarisassanik aalajangersaasinnaapput.</p>	<p>13. § 37, imm. 2, atorunnaarpoq.</p>
<p>§ 39. <i>Imm. 3.</i> Imm. 1 aamma 2 malillugu paasissutissiissutissanut malittarisassat Naalakkersuisut aalajangersarsinnaavaat.</p>	<p>14. § 39, imm. 3, atorunnaarpoq.</p>
<p>§ 40. <i>Imm. 5.</i> Selskabit suliffeqarfiillu, Kaalaallit Nunaanni atortussiassat aatsitassanit pisut il.il. inatsit, sermip erngullu avammut nioqqutissatut atorneqarnissaat pillugu inatsisartut inatsisaat naapertorlugit pisinnaatitaaffeqartut aningaasarsianit akileraarutaat, tamatumani ilaallutik iluanaarutisianit akileraarutit, landskarsip pisassarai. Aningaasarsianit iluanaarutisianillu akileraarutitut taamaattunut §§-it 27 aamma 43, naapertorlugit tapiliunneqartartut ernialiunneqartartullu taamatulli landskarsimit pisassarineqarlutillu akilerneqartassapput.</p>	<p>15. § 40, imm. 5, ima oqaasertaqarpoq: ” <i>Imm. 5.</i> Ingerlatseqatigiiffiit suliffeqarfiillu, Aatsitassat pillugit ingerlatallu tamatumunnga pingaarutillit pillugit Inatsisartut inatsisaat, Erngup nukingata nukissiornermut atorneqartarnera pillugu Inatsisartut inatsisaat aamma Sermip erngullu niuernikkut iluaqutigineqarnissaat pillugu Inatsisartut inatsisaat naapertorlugit akuersisummik pigisaqartut aningaasarsianit akileraarutaat, matumani ilanngullugit iluanaarutisianit akileraarutaat Nunatta karsiata pisassarai. Tamanna ingerlatseqatigiiffiit, Aningaasarsianit akileraarutit pillugit Inatsisartut inatsisaanni kapitali 3 b-mi pineqartut iluanaarutisianit akileraarutaannut aamma aningaasarsianit akileraarutaannut aamma atuuppoq. Aningaasarsianit iluanaarutisianillu akileraarutitut taakkununnga § 27 aamma § 43 naapertorlugit tapiliussat erniallu taamatulli aamma Nunatta karsiata pisassaralugillu akiligassarai.”</p>
<p>§ 40. <i>Imm. 7.</i> Selskabit akileraarutaat landskarsip, kommunip akileraarfiusup kommunillu pisassaraat, taamaattorli tak. imm. 5 aamma 6, aningaasarsianit akileraarutit pillugit inatsimmi § 61 naapertorlugu ukiumi aningaasarsiorfiusumi akileraarusiissutigineqarsimasup, aningaasarsianit akileraarutit pillugit inatsimmi § 62 naapertorlugu</p>	<p>16. § 40, imm. 7, ima oqaasertaqarpoq: ” <i>Imm. 7.</i> Ingerlatseqatigiiffiit akileraarutaat kiisalu ernianit akileraarutit ukiumi aningaasarsiorfiusumi procentip akileraarusiissutip Aningaasarsianit akileraarutit pillugit Inatsisartut inatsisaanni § 61 naapertorlugu angissusilerneqartup, ukiumi aningaasarsiorfiusumi procentip akileraarusiissutip Aningaasarsianit</p>

<p>ukiumi aningaasarsiorfiusumi 1. januarimi innuttaasut amerlassusiat malillugu akileraarusiissutigineqarsimasup, aammalu ani ngaasarsianit akileraarutit pillugit inatsimmi § 63 naapertorlugu ukiumi aningaasarsiorfiusumi akileraarusiissutigineqarsimasup assigiinngissutaat naapertorlugu.</p>	<p>akileraarutit pillugit Inatsisartut inatsisaanni § 62 naapertorlugu ullormi 1. januarimi innuttaasut amerlassusiannut naleqqiullugu angissusilerneqartup aamma ukiumi aningaasarsiorfiusumi procentip akileraarusiissutip Aningaasarsianit akileraarutit pillugit Inatsisartut inatsisaanni § 63 naapertorlugu angissusilerneqartup angissusii naapertorlugit Nunatta karsiata, kommunip akileraarfiusup kommunillu pisassaraat, taamaattorli tak. imm. 5 aamma 6.”</p>
	<p>17. § 44-p kingorna ilanngunneqarpoq: ” § 44 a. Aningaasarsianit akileraarutit pillugit Inatsisartut inatsisaanni § 2 naapertorlugu akileraartussaasoq iluanaarutisianik, atuisinnaanermut akiliutinik (royalty) ernianilluunniit, Aningaasarsianit akileraarutit pillugit Inatsisartut inatsisaanni kapitali 3 b, § 36 e imaluunniit §§ 88-92 malillugit, aammalu marloriaammik akileraarnissaq pingitsoorniarlugu isumaqatigiissut naapertorlugu akileraarutissaviousunit amerlanerusunik akileraaruserneqartunik pissarsisimappat, aningaasat akileraaruseriffiup utertitsinissamik qinnuteqaammik tigusaqarnerata kingorna qaammatit arfinillit qaangiutsinnagit utertinneqassapput. Utertitsineq piffissap taassuma kingorna pippat, akileraartussaasup erniat § 44, imm. 4 naapertorlugu ernianut naapertuuttut pisassarai.</p> <p><i>Imm. 2.</i> Iluanaarutisianit akileraarutininik utertitsinissamut piumasaqaatinik naammassinnittoqarnera akileraaruseriffiup pissarsisumut tunngasut pissutigalugit misissorsinnaanngippagu imm. 1 naapertorlugu tunnius-sinissamut piffissaliussaq kipitinneqassaaq, pissarsisumut tunngasut misissuinissamut akornuserneqarunnaarnissaata tungaanut.</p>

	<p><i>Imm. 3. Paasissutissat pigineqartut tunngavigalugit tunniussinissap annaasaqaratarsinnaanermik kinguneqarnissaa akileraaruseriffiup nalilerpagu, akileraarutininik unerartitsinissamik piumasaqaat isumaqatigiinngissutigineqarpat sulilu Akileraarusiinernik aalajangiisartunit eqqartuussivinnilluunniit inaarutaasumik aalajangiiffigineqanngippat, tiguisussap qularnaveeqqusiinissaa akileraaruseriffiup piumasarisinnaavaa.”</i></p>
	<p>18. § 45-p kingorna ilanngunneqarput: ” § 45 a. Piffissami pineqartumi pisassarissat erniaat 100 kr.-uppata ikinneruppataluunniit akileraaruseriffik ernialersuinngissinnaavoq.</p> <p>§ 45 b. Akileraaruseriffiup pisassarisanik ernialersuineq unitsissinnaavaa kiisalu ernialiunneqareertut tamakkiisumik ilaanakuusumilluunniit isumakkeersinnaallugit: 1) akileraaruseriffiup piffissami missingersuilluni angissusiliiffigisaani paasissutissat pigineqartut tunngavigineqarsimasut eqqunngitsuusorinarpata, 2) akileraaruseriffiup suliaq piffissaq naammaginantumik sivilissusilik qaangiutsinnagu aalajangiiffiginngippagu, naak akileraaruseriffiup paasissutissat uppersaatillu pisariaqartut tamaasa tigoreeraluarlugit.”</p>
	<p>19. § 47-p kingorna ilanngunneqarput:</p>

	<p>” § 47 a. § 47-mi malittarisassat atuukkaluartut, taamaattoq akileraartarnermut ingerlatsivik inernerusumik missingiinerup amigartoorutip naatsorsorneqarneranut sunniuteqartillugu, aningaasarsianit akileraarusiisarneq pillugu Inatsisartut inatsisaanni § 30, imm. 1, uniffiit pingajuat malillugu amigartoorutip atorneqarnerata kingorna ukiut isertitaqarfiusut aappaata naanissaa tikillugu, isertitanit akileraarusiussap missingerneqarneranut ilimasaaruteqarlunilu allanngortitsisinnaavoq.”</p>
<p>§ 59. <i>Imm. 2. Nalunaaruteqartussaataasup akileraaruseriffimmit qinnuigineqarnermigut atortut paasissutissanut nalunaarutigineqartussanut tunngaviusut nassiutissavai.</i></p>	<p>20. § 59, imm. 2, ima oqaasertaqarpoq: ” <i>Imm. 2. Nalunaarutiginnittussaataasup akileraaruseriffimmit qinnuigineqaruni atortussat paasissutissanut nalunaarutigineqartussanut tunngaviusut nassiutissavai, matumani aamma ilanngullugit paasissutissat suut nalunaarutigineqartussaanerinek aalajangiinissami atugassat.</i>”</p>
	<p>” § 68 a. Akileraartussaasoq Aningaasarsianit akileraarutit pillugit Inatsisartut inatsisaanni § 36 b, imm. 1-imi, imaluunniit imm. 4-mi pineqartoq, akit nammineq aalajangersarlugit nuussinerit pillugit piffissaliussaq eqqorlugu uppersaatinik, Aningaasarsianit akileraarutit pillugit Inatsisartut inatsisaanni § 36 b, imm. 2 naapertorlugu suliaqanngippat, akileraaruseriffik nammineerluni nalunaarsuiffimmik tunniussinissamut piffissaliussap qaangiunnerani, akit nammineq aalajangersarlugit nuussinerit taakku, Aningaasarsianit akileraarutit pillugit Inatsisartut inatsisaanni § 36 a naapertorlugu ukiumut aningaasarsiorfiusumut tassunga tunngatillugu missingersuilluni angissusiliisinnaavoq. Uppersaatiit Aningaasarsianit akileraarutit pillugit Inatsisartut inatsisaanni § 36 b, imm. 2, imaluunniit maleruagassat malillugit</p>

	<p>atuutilersinneqartut naapertorlugit suliarineqarsimallutillu tunniunneqarpata piffissaagallartillugu suliarineqartutut taamaallaat isigineqarsinnaapput.</p> <p><i>Imm. 2.</i> Akileraartussaasup akileraaruseriffiup uppersarsaatinik, Aningaasarsianit akileraarutit pillugit Inatsisartut inatsisaanni § 36 b, imm. 2 naapertorlugu misissuineranut atatillugu naatsorsuutitut il.il. tunngasunik § 58, imm. 1 naapertorlugu nassiusseqquneqarnini malinngippagu, imm. 1 missingersuilluni angissusiliinermut tunngasoq atuutissaaq.</p> <p><i>Imm. 3.</i> Imm. 1 aammattaaq atuutissaaq akilerartussaataasooq aningaasarsianit akileraarusiisarneq pillugu Inatsisartut inatsisaanni § 36 b, imm. 4 ilaatinneqartillugu.”</p>
	<p style="text-align: center;">§ 2</p> <p>Inatsisartut inatsisaat ulloq 1. januar 2024 atuutilissaaq.</p>

Tusarniaaneq pillugu allakkiaq

Siunnersuut pillugu Sulisitsisunit, SISA-mit, Nunalerinnermut, Imminut pilersornermut, Nukissiuuteqarnermut Avatangiisinullu Naalakkersuisoqarfimmit, Meeqqanut, Inuusuttunut Ilaqutariinnullu Naalakkersuisoqarfimmit, Ineqarnermut Attaveqaasersuutinullu Naalakkersuisoqarfimmit, Nunanut allanut, Inuussutissarsiornermut Niuernermullu Naalakkersuisoqarfimmit, Aatsitassanut Inatsisillu atuutsinneqarnerannut Naalakkersuisoqarfimmit Kommune Kujallermillu tusarniaanermut akissutinik tigusaqartoqarpoq.

Tulliuttut siunnersuummut oqaaseqaatitalinnik tusarniaanermut akissummik nassiussipput: Sulisitsisut.

Tulliuttuni tusarniaaffiit oqaatigisai pingaarnerit nalinginnaasumik allanneqarput, Naalakkersuisoqarfiullu oqaatigiumasai *uingasumik* allanneqarlutik.

Siunnersuummi § 1, nr. 1-imut Sulisitsisut akileraartinneqannginnermut isumaqataasut oqaatigaat, taamaalillunimi Kalaallit Nunaat nunat allat assigalugit aaqqiissusiorluni suliffeqarfiit pineqartut pitsaanerpaamik atugassaqartinnissaannik aaqqiissuussivoq.

Siunnersuummi § 1, nr. 14 pillugu, Aatsitassanut Inatsisillu atuutsinneqarnerannut Naalakkersuisoqarfik allaffissornikkut akissuteqaamminni, inatsisartut inatsisaanni § 40, imm. 5-imi inatsisissatullu siunnersuummi ”Ingerlatseqatigiiffiit suliffeqarfiillu, Kalaallit Nunaanni atortussiassat aatsitassanit pisut il.il. pillugit inatsit naapertorlugu pisinnaatitaaffeqartut aningaasarsianit akileraarutaat, tamatumani ilaallutik iluanaarutisianit akileraarutit, landskarsip pisassarai” atuarneqarsinnaavoq. Aatsitassanut Naalakkersuisoqarfiup oqaasertaliussat eqqortuugunarnerat maluginiarpaa, taamaattoq namminersorlutik oqartussat akuersissuteqartunit aatsitassanit isertitaasa aatsitassanut aningaasaateqarfimmut nakkartinneqartarnerat maluginiaqqullugu, tak. Kalaallit Nunaanni Aatsitassanut Aningaasaateqarfik pillugu Inatsisartut inatsisaat.

Tusarniaanermut akissutit aatsitassarsiornermit iluanaarutit aatsitassanut aningaasaateqarfimmut ikineqartarnerat pillugu nassuiaatini erseqqissaanissamik pissutissaqalersitsivoq.

Namminersorlutik Oqartussat isertitai tamarmik nunatta karsianut ukiumullu aningaasanut inatsimmut ikineqartarput. Tamanna Kommunit Namminersorlutillu Oqartussat missingersuutaat naatsorsuutaallu pillugit Inatsisartut inatsisaanni § 8 ima oqaasertalik malillugu:

"Aningaasaliissuteqartoqaqqaartinnagu aningaasartuuteqartoqassanngilaq aamma isertitaqartoqassanngilaq, taamaattoq tak. § 23, imm. 2". Aalajangersagaq Tunngaviusumik Inatsimmi § 46 naapertorlugu marloqiusamik tunngaveqarnissamik piumasaqaammut

*atatillugu isigineqassaaq, kingornalu aningaasanut inatsimmik aningaasaliinermulluunniit
inatsimmik akuerineqartumik tunngaveqarnani akileraarutininik isertitaqartoqarsinnaanngilaq.
Nunatta karsiata isertitami ilai, aatsitassanit isertitaneersut, aatsitassanut
aningaasaateqarfimmut nakkartinneqarnerannik aalajangersaaneq, tunngaviusumik
aningaasaliinermut pissutsinut sunniuteqanngilaq.*

Tusarniaanermut akissuteqartut sinneri akileraaruserinermik ingerlatsineq pillugu
allannguutissatut siunnersuummut oqaatigisassaqaanngillat.